

Evesus Sesoava Moakot Vev Hevtindimba Kristusinda.

¹ Kava Pol, kava moalamangnindrini Kristus Yesusna. Kava moalamangnindrini, noinda osm Sesoava mindnamba undva vrevna. Kava yem novol vinna Sesoatindim Evesuskotaram, ten ye avm, keknam undnahonam Kristus Yesusinda. ² Sesoa pina aral, eva mendekli Yesus Kristus yemoa undalm vewol evevra, wo osva yimba si undwonam avav.

Pimba Mongawundna Keknam Avna Kristusindamba.

³ Okulu Sesoam aram pivna mendeklinam Yesus Kristusnam. Kristusinda Sesoava daswolna pimba manimani besalmba senakembellini-namba, pina undmba nonapopolmba almba. ⁴ Kristusinda himba doara pimba kiki vewol vena, nonam pethava mendah venamo. Himba pimba und vewol vevna, wo noinda himba pimba kiki vewol vena hevelm, osm ora owaimomolva sewonamba si pinamba indkoklava luhungu vinvavmo. ⁵ Wo mendah pethamba os venamo, Sesoava kiki vewol vevna, vewol velm pimba hevna towandalalm. Sesoava nengna, Yesus Kristusva si wohmuhulkohovav honamba kana nengavnangva. Temba osm himba und vevna, kaoa honindaoa indk vethara. ⁶ Honanata okuliv Sesoamba, noinda henamba indva wohlohv, pim kolvrowolalm. Sesoava mindnam und vevna hevna ombolmba, wo henapopol himba pimba

undalm vewol vena. Wo noinda pioa hemoa okolalvohra.

⁷ Kristus doa pimba kilumbshuawol vena, manara noinda hena tovol sovhopena, dahavnam. Wo pinamba indkoklamba doa maikumi vinna, manara noinda Sesoava pimba mindnam undalm vewol vena. ⁸⁻⁹ Sesoava pimba mindnam undalm vewol vena, kivrawulihahui. Seilva komandhalohvna, wo heva os pimba doa levrapivolna hena nengavnangva. Honamba osm Sesoava nengna, wo himba nengavnangva vrena, velmba Kristusinda. ¹⁰ Henamba honamba si osangas hev hoanavho vrungavav nengavnangva sewonamba, nambainonoa mendekli si nonam provavm. Himba osm nengavnangva kokolma vrena, manimani senamini, eva petharinim si mongawulm sithawolvav Kristusinda kuwulinda.

¹¹ Kristusinda Sesoa pimba kikih vewol vena hevtindilmba, Sesoava doara heva doa pimba kikih vewol vena, noinda henamba nengavnangva os lohv. Sesoava memba noi hev venam, manimani lehra lohv, noinda hev ten velm nengvnam. ¹² Kava Yutanind miva lovahthamnana undnahonamba Kristusmba, manara, kamba kikih vewol vena, osm kava okulivra Sesoana pusambamba.

¹³ Doa ten luhunv yeinda kana ungrundinda. Yimba hillivna moanonoam besal nemelmom, osm yemba noi lopshavra. Nonamba yimba hillivnamba, yimba keknam undnahonam lovahthamnana Kristusmba. Wo Kristusinda Sesoava yemba kanothowol vena, daswolna hevsongolm, nom engvna hevna omokalthamom. ¹⁴ No Sesoa-

songolta pimba novpa wuleihinna, osm pimba si dumbvav, nomba temba Sesoava moamba omokalthinnamba hevtindimba. Wo honana Sesoava si pimba wohmuehvav hevelmangas. Wo si pimba avra Sesoana moainal indhana, osm okulivra Sesoana nihilmba.

Polna Sembayangmoa.

¹⁵⁻¹⁶ Noindata kava elsusva nengewuluhunv yemba kavna sembayangnamba, wo eva elsus omnalohv, Seso, yimba lehra. Kava osan-gas elsus honamba vawolohvna, nonamba kava hillinvnamba yenamba undmba, osva keknam amnav mendeklim Yesusm, eva und vewol viv owalm Sesoatindim. ¹⁷ Kava elsus sembayang velohmanav Sesoamba, pina mendeklina Yesus Kristusna aralmba. Himba pina arata, pusambara lohv. Kava osm sembayang vavov, himba si das-wolvav yemba hevsongolva, osm nomba si yemba koldombvav, Sesoamba lihalmba beswonamba. Nomba nowolva, hev ten doara yem vrahunnam.

¹⁸ Kava osm sembayang vavov, yimba si mindnam temura wohlevrapiolvav pevna nengavnangva. Wo osva si yimba levrapiolvav vuhe besalva, nomba Sesoava temba kokolma vinnamba, pimba memba himba doa kekaiv venamba hevelm. Kava osm sembayang vavovna, yimba si levrapiolvav, nomba awothowolalva besalva, Sesoava hev moamba omokalthinna hevtindimba. Hevm ¹⁹ besal snal i, eva pivva manam seihvav. ¹⁹ Wo yimba si nunglivav Sesoana keknasowolva mendeklinonoa, pim kolvrowolalm, pimba memba keknamba undnahonamba avpa. Nomba

keknasowolva andrava Sesoanamba, ²⁰ nonata, Sesoava nona wolaihaphona Kristusmba pokamariniva, wo desvhoana hembra hevna nihanasis senakembellava.

²¹ Sesoava vrena Kristusmba, mendeklikuwul wulluhunilm ovsongolnindna manimani, eva tih-songona manimani. Kristusangas senava kuwul mendekliva wulluhunv manana manana hona petharava, eva temba si sewonamba phovavpa.

²² Sesoava hembra vrena, ona, yimba kuwul wulluhunv manana manana. Wo osoa himba hembra vrena, kuwulm wulluhunilm pim Sesoatindim.

²³ Sesoatindiva Kristusna nihmsna av. Sesoatindiva Kristusnamba nihm wohlihna, os engla lahaiwo ahavna, mongla lahaiwo ahavna, snal, snal temura, mongova shalohnamoava nihsowosalva. Wo eva Kristusva yunalm lundthoana manam manam.

2

Pimba Doara Doa Sihana, Heva Os Owai, Daipotava Pivva Beswonam Av.

¹ Doa doara heva yena undva wohsiheinna, noinda yena pevna indkoklara eva manimani, pev ten sahonam vinivnam Sesoam. ² Tanam nemetva doarava yimba os avna, men daipota pethara indhanakokla avm. Yimba Setanm engivna, tihsongolna kuwulm, nomba tihsongova men hovra dalohvm, ovm piai, petham piai. Noi mongalta Setanmba daipotava wohtv henomba, temba himba aongva nithapravpa, hellelmba Sesoamba. ³ Nemetva doarava pivva indkumbiva os avna, men he. Yimba avna, wohengivna, uvna, doa kamba lehra wohkanandhawol vev. Pivva

manimani mindnamba vivna, pivna nih eva ind, he enengvnamba. Pivva kinmba vreivavta Sesoana wusprollava, noinda pivva os ambo wohavna. Pivva ambo mongawatovna os avna, ten mongla indhanakokla eungu vevm.

⁴ Heva os owai, Sesoana wavra mendekli, wo himba pimba mindnam und vewol vevna.

⁵ Pimba doaramini undna aevvna, noinda manimani pivva sahonam vinivna Sesoamba. Heva os Sesoava pimba vrahunna hevna nemelva undva Yesusinda. Wo yemba doa Seso lopshana, manara, himba yemba wavra vovhueinna.

⁶ Maim ona, himba pimba doa wolapho vena pokamariniva mongawulm Kristusmongo, wo pimba sandhana kursi besalla Kristusmongo senakembella. ⁷ Himba honamba osm vena, si himba nithinvav indkumbim hevna mendekli kolvrowolalmba, daipotam men honanam, eva sewonam, osm yunaln yunaln. Himba pimba wavra vovhueinna mindnam, osm pimba avav Kristusmongo.

⁸ Kava nengv, os Sesoava doa yemba wavra vovhueinnamba, lopshana, noinda yimba keknam undnahonam avna. Yimba vivnamoa, pevmba lopshalmba. Memba ambo nis Sesoava yemba lopshana. ⁹ Wo noinda manam yimba pevmba wivewol vivav, ova kava lehra hona andrarava, kamba lopshavra. ¹⁰ Owai, Sesoava pimba doa hevelm nemelalm hilvnisna. Kristus Yesusinda Sesoava pimba nemeltindilm hilvnisna, osm pimba ova vivra andrava beswonam. Sesoava doara nengavnangva sesvho vrinna, andram hoanavho vruwulangalm, eva

nom besal andram pivnam. Himba doara nengavnangva sesvho vrinna pimba, osmba nonangas pivva avra.

Kristustindiva Pivva Doa Mongawulm Moakot Vena, Yutanind eva Yutanindna Meisungund.

¹¹ Yimba avna Yutanindna meisungund seilva. Yemba hona indhanamba, Yutanindva os nengsmoa uvna, mospondana. Himba nomba temba yemba osva nengsmoa uvpa, hutovna, hevmba os unvna, hutovhui. Hena hutovmomba ambo osm, himba hevna nihtovra viv englana. Heva os honamba memba os nungliv, Yutanindva yei ahalwolvna hevna meisungundmongo.

¹² Ningvm keknam, osoa nemetva yimba avna Kristushui. Yimba Israelnindimba avnamoa. Wo eva owai, yimba owaimomolva kelvalohvnamoa omokalthamorava, noindava temba Sesoava vinnamba hevtindimba Yutanindmba. Yimba ningnamoa, osva Sesoava si kamba lopshavav, wo eva yimba tit vinivna Sesoamba.

¹³ Tanam nemetva yimba ehalla ahnam avna Sesoaindava. Heva os daipotava yimba Kristus Yesusna, yimba doa pepavena nihra Sesoainda Kristusna tovolla, dahavnam. ¹⁴ Noinda Kristusnangas pivva av undwonamba. Manara, Kristusva samblamba honamba, Yutanindm eva Yutanindna meisungundm, mongawatilm moakot vena. Indakonda ahawolvna, ovna, pueil ambasa lohwohulinv. Heva os Kristus nomba pueilva tuploihanga vinna, temba himba hevmba ahnamba ahawolvnamba. Himba hevmba wohk-ihpiamnana nihnahonam Sesoa aralm, honamba andramba velmba.

15 Yutanindnamba lohohmona plalva mindnam, wo kava Yutanindva noinda temurava wohengwol vivra. Heva os Kristus nomba wohkelvapingana lohohmomba, wo nona nomba ambsapulva tuploihanga vena. Kristusna undva os lohvna, no samblanindva indhanaoa nilhaprara kaindaoa, nemel indhanalm. Honamba osva venamba, pivva doa mongawundna av indwonam. ¹⁶ Krusena Kristusva putlehawolna hembra, nomba indhanamba seilva ungunalmba ahawolvnam, wo os Kristusva no samblanindva doa moakot vewolna mongawulmba mongawa nihnamba, himba wonprolm vev henga Sesoaindam. Kristusva honamba vena hevna dahalna sena krusera.

¹⁷ Kristusva pronamba, besal nemelmom wulsiheinvna, undnahonam alm yemba Yutanindna meisungundm, nonamba yimba mendah ehalla lovahvna Sesoaindava. Wo eva himba osta besal nemelmom wulsiheinvna, undnahonam alm kam Yutanindm, ten nonora amnavnam doara Sesoam. Wo noinda pivva doa mongawundna av Sesoamongova. ¹⁸ Tanam Kristusindangas pivva mongawundnamba av Sesoa araindava, noinda pivva mongawa Sesoasongolna. Noinda osva mani eva pimba olwolvav, Sesoaindamba ambalmba.

¹⁹ Wo noinda daipotava yimba Yutanindna meisungundva, yimba ahalakoholva pethahuinindva owai. Daipotava yimba doa mongawulm av Sesoatindimongo. Yimba Sesoana towandalnonoa av. ²⁰ Manara, yimba doa Kristusmba undnahonam lovahthammana,

os, maim oi, deuv noi Sesoana. Nomba deuvpa velohv katatana moalamangnindsra, eva moashulnindsra. Kristus Yesus hev hovmundilmsnamba lotholohv no deuvriniva. ²¹ Nomba deuvnamba angand, peit manimani kelvalohv Kristusinda. Wo Kristusva osm lehvna, powolara mendekli, wo mendeklinangas wohlohvra, os ten nemet tempelduv lohnam. ²² Wo Kristusindava yimba eva osta, Yutanindmongova kelvalohvta. Wo noinda pivva doa av deuvnonoa Sesoana, hui men hev avm hevsongolnahonam.

3

Polna Andra Yutanindna Meisungundra Lohvna.

¹ Kava Polva buimera av. Kamba noinda buirava wolaihasuvna, kava yem Yutanindna meisungundm kolvrowol vevnam Kristus Yesusna. ² Kava os nengv, yimba nonora av, osva Sesoava kamba vraohna hona moainal andrava, yemba kolvrowolalmba. ³ Sesoava kamba venana, osm levrapiara kana poaita moainalmomoa. Himba hev ambo kamba nethamnana. Kava doa novol vewol vena honamba eskand. ⁴ Wo yimba nomba nunglivrava, temba kava novol vewol venamba, yimba di osva levrapiavolvav, osva ora, kava tanam levrapiav poaita moainalmomba Kristusnamba. ⁵ Indhanamba nomba temba nemetva doarava avnamba, Sesoava ishunvnamoa hembra honamba poaita moainalmomba. Heva os daipotava Sesoasongolla, Sesoava doa ambara vithinna no

poaita moainalmomba hevna moashulnindmba, eva osoa kam moalamangnindm.

⁶ Honamba poaita moainalmomba os lohv, yemba Yutanindna meisungundva si wohlundthoavav yunalm, nonamba Sesoava temba ieinvpa hevtindimba, ambo lohohra, os kav Yutanind men avm. Yutanindna meisungund mongawulm moakot vena Yutanindmongo, os maim ovna, mongawanind kava. Noinda Sesoava si hembra samblamba awothowolvav mongawulm. Osva Sesoava doara pimba omokalthinna Kristus Yesusnashara. Yutanindna meisungundva honana av, noinda besal nemelmora. ⁷ Sesoa kamba undalm vrevna, noinda kava lohvena andranindrinielmba, ishomana vinilmba besal nemelmomba. Sesoa kamba vraohna hevna moalamangva, wo kava noinda henapopolva andra vevna.

⁸ Kava keusingi luhunv indkumbina Sesoatindirava. Heva os Sesoava kamba wavra vovhoamnana, ishomana vinilm Yutanindna meisungundnindm besal nemelmom, nom manimani Kristusnam. Nomba manimani mindkombawonam, levrapivolalmba, es eva seivilvav, osm Kristusva eva mendeklim awothowolm daswolalm vev Yutanindna meisungundm.

⁹ Wo Sesoa vraohna kamba andrava, ishomana vinilmba indhanamba Sesoana poaita moainalmomba. Nomba poaitamomba seilmba Sesoava komandhana, os vena, honamba ovm petham manam manam mendah venamoa, veiva, daipota heva men. Sesoava honita, manam manam memba vewol venamba. ¹⁰ Henamba nengavnangva osm lohv, nonamba

ovsongolnindva pimba Kristusnindmba nungeilvrava, himba si os levrapiolvav Sesoana nengavnangmba, temba mindnamba luhungu vevpa. Nomba ovsongolnindva eva keknasowolta, noinda Sesoava hembra mi wolana manaram manaram. ¹¹ Honamba nengavnangva Sesoava doara vrena, nonam mendah venamoa nom manam manam. Wo Sesoava himba hevna nengavnangva holothona Kristus Yesusinda pina mendekliinda, hoanavho vrungamnalm.

¹² Noinda Kristusinda pivva ambv Sesoaindava beswonamba pepehhuiva. Pimba honamba vivav, noinda doa pimba lovahthamnana Kristusmba undnahonamba. ¹³ Wo kava men yemba os unv, manam yimba mindnamba duus vivra honindava, kava memba nihsesoava ahalvpa, nonamba kava memba yemba kolvrowol vaomana vevpa. Owai, indk vithu, manara, kana nihsesoava yemba undwonam sandhav.

Kristus Yemoa Beswonam Vewol Vera.

¹⁴ Himba besal nengavnangva vrena, indkumbim awothowolalm, noinda kava mulumbdandna lohvhohomanav aramba. ¹⁵ Himba aral woheinv ovsongolnindna, pethanindna, wo hev honamba nihilva awowol vawovna. ¹⁶ Kava mulumbdandna lohvhohomnavpa, os sembayang velohmanav, yem kekaiv velm eusmonamsna, nonapopolm alm hevsongollam. Wo noinda osva yimba si keknam avav. Himba si osangas vinvav, manara himba manimani besalngas iav, nonamba pimba kolvrowolalmba.

¹⁷ Kava sembayang vinv yemba, osm Kristusva si yeindava einvra, noinda yimba keknam und-nahonam amnav. Kava sembayang vinv yemba, osm yenamba und vewolalva si keknam lohprin-vav, nonamba temba yimba indhanamba und vewol vivpa. Oi, ti pethara lohv keknaman-gas. ¹⁸ Kava sembayang vewunvna yem, eva Sesoatindim indkumbim, osm heoa hevna kel-sra lovahthara, levrapivolalm Kristusna mendek-lim und vewolalm, nomba temba himba pimba und vewol vevpa. Kava osm sembayang vin-vna yemba, yeoa levrapivolo, osoa mendekli-nonoa, wohkuvhoawol vev. ¹⁹ Kristusna und vewolalva mendeklinonoa, ombandhanariniva mongova es eva levrapivav. Heva os kava yemba sembayang vewunv, osm yimba si levrapivolvav nomba und vewolalmba. Wo yemba osva Sesoava si lundthoavav manana manana, nonapopolmba almba, wo yemba si pilivhoawol vevav.

²⁰ Sesoanapopol pimba av, noinda osva man-imani himba wohvevav, nomba mana vemava pimba osihminivrava, ningminivrava, wo himba henga nosra sena moawohonam huhlinvav. ²¹ Wo noinda osva Kristusnind Sesoana okulimnivm hena nihilmoa elsus osangas.

4

Mongaooa Nihra Kelvav.

¹ Kava buira av, manara noinda kava mendeklim lohmanavna. Sesoava doa yemba kekaiv vena hevtindilm. Men kava yemba ishunv, os ao, osm ora, os ara Sesoatindioa besalangas. Wo himba noinda indk vethavav.

² Elsusoa osangas novnovhora ambo avm kumungilmsna, wo pepeivim mongnindmoa pevna undnahonam. ³ Yimba doa tiklamsna vosaprana mongawa hulira, undnahonam mongawundnam Sesoasongolnamini. Viu, osangas wohvivism mongawulm hona wevsanangas. Wo noinda osva yeoa keknam vivm mongawulmoa, mongawundnamba almba.

⁴ Pivva Kristustindiva os av, mongal nihva, mongal Sesoasongolva. Wo Sesoava uwunv yemba, osm ao mongawundna, osm pimba si vuhe besalla avav. ⁵ Pinamba mongal mendekliva, mongal keknamba undnahonamba lovahthamnalmba mendeklimba, mongal ponamba poswol velmba. ⁶ Pinamba mongal Sesoava, wo aral manana manana. Himba kuwul mendekli wulluhunv manana manana. Himba vavawonam lehra vetha luhungu vev manamera manamera.

⁷ Kristusva pimba indakonda wohdaswolna moainal andranamba. Indakonda wohvravna, nomba temba Kristusva nengvpa, moang vinilmba hembra. ⁸ Memba honamba osra novel velohv Sesoana doaramini tombairava, Nonamba himba senamba vongavnamba, himba mi luhunna, buinindmba ningingalmba, hev ten kuvhoawol venam daosnindm, wo tovolsangalva diamnavna. Wo himba daswolna manimani besalna indhanamba hevnamba. *Buk Song 68:18*

⁹ Nomba temba osva ovpa, himba senam vongav, esm hevpa temba osva olhv? Temba osm olhv, himba seilva holopena petharam.

¹⁰ Yesusva holopena, wo eva hengasta henga

himba vongana. Himba vongana ovrām senakembellam. Kristusva honamba osm vena, himba yunalm lundthoavav manam manam hevna, indhanam eva manam manam.

¹¹ Wo Kristusva daswolvna moainal andrava indhanamba, temba himba kiki vewol vevnam. Monglam nom moalamangnindm. Monglamba nom moamba Sesoanamba dumbvnamba, os indhanamba ishunvna. Monglamba Sesoana besal nemelmom wulvahmana vinilm, indhanam nom ten mendah titnam avnam, monglamba sna indhanam, Sesoana moana plalm temuram velokusa vinilm Sesoanindm. ¹² Kristusva daswolvna no moainal andrava, osm kokolma vewolalm Sesoatindinonowolm andram, osm Kristusnindoa noinda keknamoā hovmundilmsnaoa wosalohra. ¹³ Hona andraoa osangas yunalm wohgara, verava, pivva indkumbiva lohohrava mongawundnamba avrava, wo eva mongawa nowolna amnavra ombolm Sesoanam. Pioa nithapralohra hevmsna, pioa osangas wohara, verava, os ten hev Kristus lohvm, wo dumbvra hena mongawa besalwevsangas.

¹⁴ Wo hengava pivva si avramoa, osva otolmsnamba, osva os nengloh vevpa, os nengloh vevpa. Pimba si patvunvavmoa nomba moamba nemelva, temba pimba hillinvpa indhananamba, osmba pimba kitakita vewol oviv. No indhanamba doa kokolma vewol vina nengavnangva, wo lehwol viv, osm os veloh viv, os veloh viv, plel velm, indhanam patvunilm monakoklaram. ¹⁵ Owai, pivva eishovra tanamolnamangas, und vewolnahonam. Wo pivva si beswonamangasm nilhapravra hena

wevsana, ova temba Kristusva, himba kuwulva hevpa. ¹⁶ Pimba Kristusnindva maim oi, Kristusna nih. Nihsowosalva Kristusnamba mindnam snal snal snal os, wo heva os snal snal dingoho kusingi wosalohprav. Wo ova vellava, indkumbiva snal snal beswonam mongawundna, ova aklihaklaha vevra mongawulm, wo ova Kristusna nihmba hevna velgonamsna si lohvra. Wo snal snal indakondava si kevrawuleivra, wevsam und vewolalm undnahonam owalm Kristusnindm.

Yeoa Honanamo a Os Ao.

¹⁷ Kava mendeklina moalamang kuvuluhv, kava hona moamba yemba ishunv. Kava men yemba ongawolv, osmba manam yimba osangasva avra, temba nomba eungu vevpa Kristushuinindva. Hena nengavnangrava mana vemava besalva luhungu vivmoa. ¹⁸ Himba owai, levrapiolvmoa. Himba wevsabesalva nonorava avmoa, manara himba hellelmba vivmoa. Wo noinda ova himba owai, himba avmoa no undnamba, temba Sesoava daswolvpa. ¹⁹ Himba lou vewol vivmoa, noindava temba hevpa sahonamba amana vevpa. Wo himba hevna almba osmangas viv, sahonam mana vemakoklam vilangalm. Himba mindnam wohningv, osmangas vewuvmonalm manam manam sahoklalm.

²⁰ Heva os manam manam memba yemba numhowol vivnamba Kristusmonamba, owai ova honamba. ²¹ Kava nonora lohv, ova yimba hillina Kristusmoava doa, wo yimba henamera av, yemba numhowol vivna tanamolmona. Tanam, moanonoava Yesusnamini. ²² Yemba

numhowol vivna, wuleihalm pevnam doaraminim undm, wuleihu almao osmoa, temba pevpa nemetva avnamba sahonamba. No doaramini indkoklarata mindnamba wohindkokla vilonata, manara noinda indhanamba plel vena mana vemakoklara, himba yunalm vevuvmona velm vivna.

²³ Heva os yemba numhowol vivna, und nemelnam alm. ²⁴ Yemba numhowol vivna, nemeltindilm alm. Wo nomba nemeltindiya osm nilhapralm, ora Sesoa hev, wo osm besalanges, eva Sesoalmangas avra. Owaimomolva mana vemava sahoklalva eskandva heindava luhungu vinvramoa.

²⁵ Wo doa yeoa wuleihivm, moakokomomoa isholmoa. Eishunvm owapevmoa moaoa tanamangas, manara noinda himba pina mongawanind Kristusnind. ²⁶ Mana vemarava yemba mindnamba wusprotava, manam yemba eisevav, sahokla velmba. Wo manam yenamba indva pevvawovav, osva verava, okombava pelangalla avra. ²⁷ Yimba osva vellava, temba yimba doa nih wuleihimnina Setanmba, osmba ovra, lehra kamba newond vevol vev. ²⁸ Mongova indhanariniva yukovindrivna lohtava, heoa wuleihara yukovnamoa, andra vera. Heoa hevna englana nengand vrera manam manam besalmoa. Wo os himba si lohvav innetnamba, noi moang vinvra owalmba nomba innehuinindmba.

²⁹ Yimba moamba eishovpa, heva moakoklam moalusnam nom owaiva. Moaoa snangas ovra, indhanamba nom und viv, wo moamba si kolvrowol vevra, owalmba nonapopolmba

keknamba almba. Wo nomba yimba eishovrava, si kolvrowol vevra, nomba temba himba nomba hilwilvrava yemba. ³⁰ Wo manam yimba Sesoasongolmba kinmba vreiuhvav. Memba Sesoasongolva yem wohlihawolalm, osm ora yimba Sesoanangas av. Sesoava yemba daswolna hevsongol, osm os nunglivra, pimba si wohavra helmangas, nonamba Kristusva si hengava provrava. ³¹ Manam yimba nengavnangva sahoklalva vrevav, wusprovav. Manam yimba vevandnamba daosnahonamba velaipulvo ovinvrava moamba snamba, owai. Manam yimba mongova hengava mana vemava sahoklalva vevav. ³² Besal wevsanangas vivm, wo owapevmoa beswonam vewol vivm. Maikumi vinvm owapevnamoa, temba himba yemba indkokla vewol vinvnamba. Os Seso men yenamba mai vinnam Kristusnana.

5

Woklakambaramsna Ao.

¹ Yimba Sesoatindi av, yemba himba mindnam und vewol vev. Wo noinda osva yeoa nilhapro, os Seso hev ten. ² Elsus yeoa owapevmoa und avramana vevm, manara Kristusva eva pimba und vewol vevta. Kristusva hevmba wurahunna pim, nonamba hembra dahavnamba kruserava. Wo osva himba tinen teteihnungna sengrinimsna Sesoamba venana, osm noinda heoa pimoa losnamonaoa holvorombol vevra.

³ Heva os owainonoa, anvema goariskui vevav. Anvema mongona mana emam muemb nevra, mana vemam sahoklalm velm, owainonoa.

Memba hona wevsava owainonoa, luhunvavmoa lehrava yeindava Sesoatindinindrava. ⁴ Wo eva osva, manam yimba moakoklanamba moalusnamba eishovra pevmba. Manam yimba sahonamba moamba eishovra muerimomba, owainonoa. Memba honamba manimani owai, lehrava luhunvavmoa yeindava. Heva os yeoa Sesoamo os ativra gamnavra, yimba lehra av. ⁵ Yeoa honamo beswonam temura levrapivolo, mongomba si vuhemba lohmanavavmoa Kristustindinindimba, himba nomba ongariskuiva vivrava, mana vemava sahoklalva nomba vivrava, wind vivrava, mana vemamba hevmangas ningvra. Mongova henomba manimani hevmangasva iavrava, himba osva temba tihsongokoklam sembayang vaomana venav Sesoana novrava. Manara noinda osra, Kristustindi eva osoa Sesoatindi.

⁶ Novnovhora vivm, ata homeis indhanarini mongo yem deisumbisihavm, vinilm manam manam, heva os owai, sahoklal. Wo heva os honindava manara manara si Sesoana lomothava holothunvav hindmba, nomba temba himba engmba hembra owai vivpa. ⁷ Wo noinda osva owainonoa, manam yimba hembra patvunvav.

⁸ Seilva nemetva yimba avna sikulmonam, heva os daipotava yimba doa Yesus mendeklinakambara av. Wo noinda osva sna indhanamsna ao, ten hind noi losnamona owovm pusambanakambarangas. ⁹ Manara, pusambanakambarangas phov wevsava, beswonam almaba, eva osoa indhana windel alm Sesoana novram, eva osoa sna indhana, himba moanonoa wohishuv. ¹⁰ Keknam lihvm, levrapivolalm, osm Sesoava undva os

vevra.

¹¹ Yimba manam nomba osva vivav, temba nomba sikulmunindva vivpa. Noindava owainonoa, mana emava beswonamba phovmoa. Heva os besal yeoa viu manimani, inethalm hem, osra manimani temba himba nomba vivpa, sikulmonandrava owai, sahokla vev. ¹² Lou vev, isholmba, nomba temba no indhanamba vivpa poaitava. ¹³ Heva os woklava lehv, manam manam beswonam nungsis vivra, nomba sahoklalva. ¹⁴ Wo henga woklamsna lovhoavrava, manimani temba nomba beswonamba nungsis vivra. Memba honamba, noinda honamba osva ona, Pholahangao ninmerinioa. Yeoa pho pokamarinioa, wo Kristus si yemba woklamsnamba pusamba vethamnavav. *Aisaia 26:19*

¹⁵ Wo noinda osva ambo novnovhora amana mana vevm. Manam yimba osva avra, maim ovra, nengavnanghui. Owai, ambo lohohra osangas nonoanindmsna awolavm. ¹⁶ Kava ov honamba, osm yeoa nambaimoa pevnamoa wus nungupieivm, noindaoa temba yimba beswonamba vivpa, manara noinda memba daipotava ambo sahonam amana vevm piv. ¹⁷ Wo noinda osva manam yimba nowolhuimsnamba avra. Keknam kevru nomoa, temba mendekliva yemba ninginvpa, nomba velmba.

¹⁸ Manam yimba mindnamba wainpolva hlavra, daielmba. Ata homeis yimba pevna undm indkokla vevol vivm. Owai, Sesoasongolmoa keknam iswol viu pevna undraoa, yem wohtalm. ¹⁹ Ishunvm pevmoa no moana, ten sangal tombaira lohvm, sangalna eva Sesoasongolna

sangalna. Nooa sangalnaoa manimani pevna undnahonam vinivm mendeklimoa. ²⁰ Elsusoa osangas Sesoamoa aramoa umnivm, lehra, manara manara, pivna mendeklina nihilna Yesus Kristusna.

Tendona Ongana Evrowolvm.

²¹ Pevm kokolma avramana veo, osm engwolvivm henom henom monglam onganganam. Honaoa vivm, manara noinda yimba beswonam popeng vriv Kristusmba. ²² Ungevli, yeoa pevna tlahumunpevna ninisingi aevulangavm, os ten pev amnavm Kristusna ninisingi. ²³ Tendorini kuwulva wulluhmanav hevna ongalnamba, manara Kristus Kristusnindna kuwul wulluhunvm. Kristusnindva Kristusna nih, manara, Kristusva lopshana hembra. ²⁴ Kristusnind ninisingi amnav Kristusm. Eva osoa pevna ungevlioa vinvm hevna tlalmoa. Yeoa ninisingi einvm, manara manara pevna tlapevindaoa.

²⁵ Tendo, yeoa pevna ongahumunpevmoa undalm vewol viu, os men Kristus undalm vewol vevm Kristusnindm. Kristusva daheinna Kristusnindm, ²⁶ kekaiv vena eusmonamsna hevelmangasm. Wo noinda Kristusva poswol vena ponamba, hngam nemelalm nilhawolalm hevna moanam. ²⁷ Kristusmba dahana, osm himba kihpieinv Kristusnindmba hevmba, osm owai, nihvuhinv manimani sahoklalva ketheinvavmoa heindava. Hembra osm dahana, Kristusnindva hevhoava tit vivav, mana emakoklamba velmba, eva nom sahoklalm, noinda ten luhungu vevm. Kristusoa os nongalvra, mosva hev ambo tovonevna ongamalongorinimsna.

²⁸ Kristusva os undalm vewol vena hevna Kristustindimba, wo eva noindata tendooa hevna onghamunilmoa osta undalm vewol vivrata. Tendoriniva hevna ongalmba mindnamba und vetava, eva hevna nihmba himba os und vevta. ²⁹ Manara, mongova indhanariniva hevna nihmba sahonamba vrevmoa, heva os popeng vrev hevna nihmba. Memba osm, Kristusva os vinna Kristusnindmba, ³⁰ noinda pimba tendona onganamba Kristusna nih mongnasisrini av.

³¹ Sesoana tombairava moamba os novol velohv,

Tendoriniva si pewolehawol vevra hevna araravalmba, wo ongali enewolkohowolvav.

Wo os hembra nilhawolvav, ora mongal.

Stat 2:24

³² Honamba poaita moainalmomba mendekli hevm, moamba seilva komandhalohvna, wo men kava ishuny, Kristusm eva Kristusnindm, osm himba tlongolmsna av. ³³ Heva os henoi henoi yerinioa pevna ongapevmoa nesmos vewol vivm, os ten pev pevm nesmos avramana vevm. Wo ungevlioa eva hevna tlalmoa os popeng vewol vivrata.

6

Otovotalm Eva Araravalm.

¹ Yea otovotaloa, yea pevna ararapevmoa mongawa aongna hilwilvm, os mendekliva undva vrev, manara noinda honamba memba yimba Sesoana novrava vivra. ² Lohohmorava os novol velohv,

Keknam undnahonam popeng vewol vivm pevna ararapevmoa.

Honamba lohohmomba, omokalthamoi
 esiwohav mongawulm. ³ Honamba
 omokalthamomba os novol velohv,

Yimba pevna ararapevmba popeng vewol vitava,
 wo nomba manimani si yimba asahvav-
 moa, wo yimba si osva eukwonam aevulvra
 petharava. *Kisim Bek 20:12, Lo 5:16*

⁴ Yimba arahumunilva, manam yimba
 sahonamba indkokla vewol vivra pevna
 otovotalmba, osmba ora noinda wusapramana
 vevra, owai, sishona vewol vivm hemoa
 mendeklina moara, eva numhowolalm.

*Ombandhana Andranindrinim Eva
 Duangkuwulm.*

⁵ Ombandhana andranind, keknam
 wohengivm moamoa pepehna pevna
 kuwulnamoa huioa petharaoa. Wo nooa keknam
 undnahonam wohvivm, temba tanamolnam
 mongawa wevsana ambo, os ten pev Kristusm
 engivm. ⁶ Manam yimba novtatholmba

vinvra pevna kuwulmba, osm indk vithira,
 men kamba murapeta kekalvho vruwul vinv.
 Owai, eva hevnasiraoa osangas wohandra
 vinivm. Yea hemoa os engwol vivm, men
 pev Kristusm wohengivm. Pevna undnahonam
 osoa wohvivm, nomba temba Sesoava undva
 vrevpa. ⁷ Viwul vevm pevna andraoa, indk
 vithivm, velmoa. Andrava nomba snal, yimba
 mendeklim venav, snamba owai, ovra, kava
 indhanarinimangas kolvrilm vev. ⁸ Keknam
 honamoa ningu, mendekliva si lundthoavav
 hevna indhanamba indkumbimba indakonda,

ombandhana andranindm eva kuwulm, temba beswonamba vivnamba.

⁹ Kuwul eva osangasta, beswonam vinvm pevna ombandhana andranindmoa. Manam yimba snamba ishunvra pepehmomba hembra. Yimba nonora av, mendekliva senakembella einv, yem eva pevna andranindm indkumbim. Wo yemba si mongawulm moakot vevav, lesvhoawolalmba lohohra.

Wohsolthoawol Viu Wusooa Sesoanaoa.

¹⁰ Kanamba eunilliniva moamba men, keknam ao mendeklimongo hevnapopol.

¹¹ Wohsolthoapro yunam wusooa, osm yimba nonapopol daos ohovra Setanna daswoposworava.

¹² Pinamba daosmba indhanamongomba luhunvmoa, pethanindrava. Pivva honamongo daos ohov tihsongokoklam-ongo, noi ten petham manam manam hengas vaohotholm vivm, men honanam piv men avm daipota sikulmonam. Pivva daos ohov tihsongokoklamongo, himba sena mepeh aevulv.

¹³ Pimba mendah sikulmonam av hona petharava, noinda yeoa wohksavhoavm Sesoana wusona keknam. Osm nonamba Setanmomba sihapra vevrava, yimba nonapopol keknamba lovahthapravra. Wo verava, yimba nonamba daosva walwol eputrombtpiarava, wo yimba pevpa keknam wohlovahra pevna kelsra.

¹⁴ Yimba tanamba keknamba lovahthalmba vetava, bannamsna pevm killawol viu keknam yuhra. Memba Sesoana moanonoa. Wo eva alvoraoa vewol viu wusomsna, nonapopolm

beswonam alm. Memba wusomba honamba osm, yimba Sesoana novrava lehra windel wohlohv.

¹⁵ Wo pevna monglaraoa spatomsna vewol viu. Memba wevsava, besal nemelmom wulvahmana vinilm, osm indkumbiva indhanamba si beswonam akanandhamana vevav Sesoamongova. ¹⁶ Wo eva holtuvmsna daosrinioa velavro. Memba undnahonam vivm, annalm Sesoam. Wo os yimba nona hetomosa vewol vinvra bunena suwenamba, nomba temba Setanmba yemba weilhapra vevrava.

¹⁷ Yeoa nomangas ningvm, Seso doo pimba lopshana, wo no nengavnangoa yeoa topimsna solthoawol viu. Wo vrapiao ovlakasbona Sesoasongolna, temba nomba ovlakasbonava Sesoana moa. ¹⁸ Elsus sembayang vewuvmona vevm Sesoasongolnapopol. Sembayangnaoa os vivm manam manam, wo osihminivm nomoa, temba pevpa nomba ningvrava. Honamba velmba, yeoa elsusoa osangas ambo plasra aevulvm. Manam kivrawuliha vrivra, osangas sembayang vewuvunvm indkumbim Sesoatindimoa.

¹⁹ Wo eva kamoas sembayang vewuvmonavmta, osm sembayang vewuvm, nonamba kava moamba ishovrava, Sesoava si kamba moamba vrahovav, osm kava honi ishunvav poaitamomba besal nemelmonamba loushui. ²⁰ Kana andra lohv, moamba wulluholmba, nomba besal nemelmomba. Kava men honamba vavov hui buimera. Sembayang vivm, osm kava numhowol vevrava besal nemelmonamba, kava si ishomana vinvra, loushui kava vevra.

Polva Sesoam Osahmanana, Beswonam Vewol Velm Hem Evesusnindm.

²¹ Kava ten wolaihaprinv yemba Tikikusmba pivna mongawa Kristusnindrini, hemba pivva und viv. Himba besal andranindrini mendeklina andrarava lohv. Himba si yemba ishunvav manam manam, nomba memba kamba nonglaphonamba. Wo yimba si hillivav, osva es kava?, wo kava mani vev? ²² Noinda kava hemba wolaihaprav, kava yem osm vinv, hellelm, es yimba av. Kava wolaihaprana hemba, yem henganm pupul vewolalm. ²³ Sesoa ara, eva mendekli Yesus Kristus, yemoa wainesmos vevol vera, wo yimba beswonam undwonam avav. Wo yimba noinda si keknamba einvra hemba. Wo osoa ye vevra, owapevm und avrama vevra. ²⁴ Sesoaoa yemoa indkumbimoo undalm vevol vevra, nom ye ten henoi und vivm pivna mendeklim Yesus Kristusm, nomba und velmba si owai, es eva wohvitivoavav. Doata.

**Sesoana Besal Nemelmoa Walsana Moana
Genesis, Ruth, Jonah, and The New Testament in the
Waris Language, also called the Walsa Language, of
Papua New Guinea
Buk Stat, Rut, Jona, na Nupela Testamen long tokples
Waris long Niugini**

Copyright © 2002 The Bible Society of Papua New Guinea

Language: Walsa/Waris (Waris)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-04-23

PDF generated using Haiola and XeLaTeX on 22 Feb 2024 from source files dated 31 Aug 2023

81136742-8dfd-57f5-95ae-cd3afb267b0d